

Canllawiau ar Siarad yn Gyhoeddus yn Is-bwyllgor Hawliau Tramwy Cyhoeddus

Bydd y darpariaethau yn y ddogfen hon hefyd yn berthnasol i holl gyfarfodydd yr Is-bwyllgor Hawliau Tramwy Cyhoeddus y mae'r Cyngor / Cadeirydd yn penderfynu eu cynnal ar sail rithwir yn unig neu ar sail hybrid (h.y. mynychu o bell).

Polisi Cyfarfodydd Aml-leoliad Bro Morgannwg

Dylai personau sy'n ystyried siarad mewn cyfarfodydd yr Is-bwyllgor Hawliau Tramwy Cyhoeddus roi sylw ymlaen llaw i Bolisi Cyfarfodydd Aml-Leoliad y Cyngor, sydd i'w weld drwy ddilyn y ddolen hon.

Yn unol â'r Polisi Cyfarfodydd Aml-Leoliad, cynhelir cyfarfodydd yr Is-bwyllgor Hawliau Cyhoeddus o bell trwy system gyfarfod Hybrid/O bell y Cyngor.

D.S. Yn unol ag Adran 46 Deddf Llywodraeth Leol ac Etholiadau (Cymru), rhaid i'r Awdurdod sicrhau bod cyfarfodydd Prif Gyngor a benderfynir gan y Cyngor / Cadeirydd i'w cynnal ar sail rithwir yn unig neu hybrid (h.y. mynychu o bell), yn cael eu darlledu'n fyw ac ar gael i'w gwyllo'n electronig ac eithrio pan nad yw'r cyfarfod yn agored i'r cyhoedd (Rhan II – gwybodaeth gyfrinachol neu sydd wedi'i heithrio). Bydd y cyfarfodydd yn cael eu ffrydio'n fyw ar wefan y Cyngor a'u harchifo wedi hynny i'w gwyllo yn y dyfodol.

Sylwadau Ysgrifenedig ar Geisiadau Hawliau Tramwy Cyhoeddus

Dylid cyflwyno gwrthwynebiadau i geisiadau hawliau tramwy cyhoeddus, neu sylwadau o blaid y geisiadau, yn ysgrifenedig.

Pan fydd cais yn cael ei ystyried gan yr Is-bwyllgor Hawliau Tramwy Cyhoeddus, caiff sylwadau ysgrifenedig eu derbyn os ydynt yn dod i law erbyn 10am y diwrnod gwaith cyn cyfarfod yr Is-bwyllgor. Er enghraifft, os bydd cyfarfod yr Is-bwyllgor ar ddydd Mercher, yna derbynnir sylwadau ysgrifenedig sy'n dod i law erbyn 10am ddydd Mawrth.

Cyfeirir at y sylwadau sy'n cyrraedd yn rhy hwyr yn adroddiad y pwyllgor (Sylwadau Hwyr), ond bydd y sylwadau sy'n dod i law erbyn 10am y diwrnod gwaith cyn cyfarfod yr Is-bwyllgor yn cael eu rhannu gydag Aelodau'r Is-bwyllgor Hawliau Tramwy Cyhoeddus y noson cyn yr Is-bwyllgor.

Gall sylwadau hwyr sy'n cynnwys symiau sylweddol o ddeunydd newydd arwain at ohirio ystyried y cais dan sylw er mwyn sicrhau y gellir ystyried y deunydd yn briodol.

Cyhoeddi Papurau Agenda

Bydd Papurau Agenda ar gyfer cyfarfod perthnasol yr Is-bwyllgor Hawliau Tramwy Cyhoeddus yn cael eu cyhoeddi tua 5.00pm **o leiaf** 9 diwrnod cyn dyddiad y cyfarfod. **Gellir cyhoeddi'r agenda'n gynnar i osgoi ei chyhoeddi ar y penwythnos.**

Siarad yn Gyhoeddus

Mae'r Pwyllgor Hawliau Tramwy Cyhoeddus yn Is-bwyllgor parhaol y Pwyllgor Cynllunio ac mae ganddo awdurdod dirprwyedig i wneud penderfyniadau mewn perthynas â materion sydd wedi'u cynnwys yn ei Gylch Gorchwyl. Gellir dod o hyd i'r rhain yn Adran 14 o Gyfansoddiad y Cyngor. Ar rai achlysuron, bydd ymgeiswyr neu wrthwynebwyr, neu'r ddau, am wneud sylwadau wyneb yn wyneb i'r Is-bwyllgor Hawliau Tramwy Cyhoeddus.

Hysbysiad i Siarad

Rhaid cael rhybudd digonol ymlaen llaw gan siaradwyr er mwyn cael syniad o bresenoldeb tebygol y cyhoedd a chynnig cymorth a chyngor i'r rheiny nad ydynt yn siŵr beth i'w wneud nesaf a / neu sy'n dymuno siarad gerbron yr Is-bwyllgor yn Gymraeg. Efallai y bydd hefyd angen datrys unrhyw faterion yn ymwneud ag enwebu siaradwr a rhoi amserlen resymol i'r unigolyn hwnnw gydlynu ei ymateb.

Cofrestru i Siarad

Cyhoeddir y Papurau Agenda ar gyfer y cyfarfod Is-bwyllgor perthnasol yn electronig o leiaf 9 diwrnod (gan gynnwys penwythnosau) cyn dyddiad Cyfarfod y Pwyllgor.

Bydd y cyfnod i wneud cais am siarad yn y cyfarfod yn agor am 8.30am y diwrnod ar ôl cyhoeddi'r Papurau Agenda a bydd yn parhau ar agor am 6 diwrnod (y diwrnod cyntaf yw'r diwrnod y bydd y cofrestru yn agor). Bydd y cyfnod cofrestru yn cau am 5.00pm ar y chweched diwrnod. Dylai aelodau o'r cyhoedd sy'n dymuno cofrestru i siarad yng nghyfarfod Is-bwyllgor Hawliau Tramwy Cyhoeddus y Cyngor wneud hynny drwy lenwi'r ffurflen gofrestru briodol i siarad yn gyhoeddus erbyn 5.00pm tri diwrnod gwaith clir cyn y cyfarfod heb gynnwys diwrnod y cyfarfod.

I gofrestru i siarad, dylech lenwi'r ffurflen ar-lein, sydd i'w gweld ar y dudalen ganlynol:

[Cyfranogiad y Cyhoedd mewn Cyfarfodydd y Cyngor \(bromorgannwg.gov.uk\)](http://bromorgannwg.gov.uk)

Lle mae sawl parti'n rhannu'r un farn, byddant yn cael eu hannog i enwebu siaradwr arweiniol. Er mwyn hwyluso hyn, oni bai y rhowch wybod i ni yn benodol i'r gwrthwyneb, drwy gofrestru i siarad rydych chi'n rhoi caniatâd i'r Cyngor anfon eich manylion cyswllt at bobl eraill (o'r un farn) sy'n cofrestru i siarad. Bydd hyn yn eich helpu i enwebu un llefarydd.

Rhowch wybod i'r Tîm Gwasanaethau Democrataidd, cyn gynted â phosibl ar 01446 709855 neu Democratic@valeofglamorgan.gov.uk, os oes angen unrhyw gymorth ychwanegol arnoch i gyflwyno'ch sylwadau.

Cydnabyddir nad oes gan rai unigolion fynediad at gyfleuster electronig. Bydd yr unigolion hynny'n gallu cofrestru i siarad dros y ffôn ar 01446 709855 (gofynnir iddynt gyflwyno'r un wybodaeth sy'n ofynnol ar y ffurflen ar-lein) a bydd cadarnhad o'u cofrestriad yn cael ei roi ar lafar yn ystod yr alwad ffôn.

Ar ôl i chi gyflwyno eich Ffurflen Gofrestru, byddwch yn derbyn e-bost cadarnhau awtomatig yn eich hysbysu eich bod wedi'ch cofrestru'n llwyddiannus. Ar ôl i'r Dyddiad Cau ar gyfer Cofrestru fynd heibio, bydd y Swyddog Gwasanaethau Democrataidd sy'n cefnogi'r Is-bwyllgor yn cysylltu â chi i roi copi o'r canllawiau hyn i chi ac i gadarnhau'r amser siarad a roddir i chi.

Amser Siarad

Caniateir uchafswm o 6 munud ar gyfer y rheini sy'n cofrestru i siarad o blaid neu yn erbyn cais i annerch y Pwyllgor. Mae hyn yn cyfateb i uchafswm o 12 munud o amser siarad cyhoeddus fesul Cais.

Fel rheol, caniateir uchafswm o 3 munud i bob siaradwr unigol i annerch y Pwyllgor, ar yr amod y rhoddir yr un faint o amser i'r rhai sy'n siarad o blaid ac yn erbyn y cais. Er enghraifft, os bydd dau berson neu fwy yn cofrestru i siarad yn erbyn cais, ond dim ond un person sy'n cofrestru i siarad o blaid, bydd yn cael chwe munud i siarad. Mae hyn er mwyn sicrhau bod amser cyfartal yn cael ei roi i'r rhai sy'n siarad o blaid ac yn erbyn unrhyw gais.

Os bydd mwy na dau berson wedi'u cofrestru i siarad o blaid neu yn erbyn, fe'u hanogir i enwebu un llefarydd gan y bydd y cyfanswm o 6 munud yn cael ei ddyrannu rhwng yr holl bobl sydd wedi'u cofrestru. Rhaid bod unigolyn wedi ei gofrestru cyn y gall drosglwyddo yr amser siarad a neilltuwyd iddo i lefarydd enwebedig. Nid oes angen i'r llefarydd enwebedig fod wedi'i gofrestru.

Os yw dau neu fwy o siaradwyr wedi'u cofrestru i siarad ac nad oes unrhyw lefarydd yn cael ei enwebu, neu os na chaiff cytundeb ei wneud ar faint o amser sydd i'w ddyrannu rhwng y siaradwyr, yna bydd y 6 munud yn cael ei rannu'n gyfartal ymhlith yr holl siaradwyr sydd wedi'u cofrestru.

Os dyrennir y 6 munud llawn i 2 siaradwr ond nad yw 1 o'r unigolion yn mynychu, neu os bydd yn tynnu'n ôl yn ystod y cyfarfod a/neu'n rhoi ei amser siarad i'r siaradwr arall sydd wedi'i gofrestru, yna bydd cyfanswm yr amser yn dychwelyd i 3 munud, oni bai bod 2 siaradwr ar yr ochr arall. Os mai dim ond 1 siaradwr sydd ar yr ochr arall yna bydd amser siarad y gwrthwynebydd hefyd yn dychwelyd i 3 munud. Glynir yn gaeth wrth y cyfyngiadau amser.

Ni chaiff y bobl hynny sy'n annerch yr Is-bwyllgor ddogfenarthu unrhyw ddogfennaeth i Aelodau yng nghyfarfod yr Is-bwyllgor, ac ni chaniateir unrhyw gyflwyniadau.

D.S. Mae'r weithdrefn hon yn berthnasol i Gynghorwyr Tref a Chymuned, y mae'n rhaid iddynt gofrestru i siarad hefyd yn unol â'r canllawiau.

Pwy all siarad

Yn amodol ar gydymffurfio â'r gofynion cofrestru a gweithdrefnol a nodir yn y canllawiau hyn, gall y bobl ganlynol siarad:-

- Gwrthwynebwyr neu'r rhai sy'n mynegi pryderon ynghylch y cais neu eu cynrychiolydd.
- Yr Ymgeisydd a/neu ei gynrychiolydd a/neu unigolion eraill sy'n dymuno cefnogi cais, yn ôl disgrisiwn yr Ymgeisydd neu ei gynrychiolydd.
- Cynrychiolydd Cyngor Tref neu Gymuned; ac
- Unrhyw Gynghorydd a etholwyd i Gyngor Bro Morgannwg nad yw'n aelod o'r Is-bwyllgor Hawliau Tramwy Cyhoeddus.

Nodwch nid yw'n ofynnol i Aelodau Etholedig Bro Morgannwg gofrestru i siarad, a chânt uchafswm o 5 munud o amser siarad, ni waeth sawl Aelod sy'n dymuno siarad.

Rhaid i Gynrychiolwyr Cynghorwyr Tref a Chymuned gofrestru i siarad, a chânt uchafswm o 3 munud o amser siarad er mwyn iddynt gynrychioli eu Cyngor unigol, ni waeth pwy arall sydd wedi'i gofrestru i siarad. Rhaid i'r unigolyn sydd wedi cofrestru i siarad ar ran y Cyngor Tref neu Gymuned gael ei enwebu gan Swyddog Priodol y Cyngor h.y., Clerc y Cyngor Tref neu Gymuned neu berson cyfatebol dros dro, a hynny drwy e-bost a anfonir at Democratic@valeofglamorgan.gov.uk. Dim ond un cynrychiolydd o bob Cyngor Tref a Chymuned a all siarad ar unrhyw gais unigol. Pan fydd ceisiadau trawsffiniol yn cael eu hystyried, bydd gan Gynghorwyr Tref a Chymuned o bob ardal 3 munud o amser siarad yn yr Is-bwyllgor.

Nid oes angen i Swyddogion Cyngor Bro Morgannwg a/neu unrhyw gynrychiolwyr y maent wedi'u henwebu i gyflwyno adroddiadau i'r Is-bwyllgor ar eu rhan gofrestru i siarad ac nid ydynt yn destun amseroedd siarad penodedig.

Trefn y Siaradwyr

- Yn y cyfarfod, bydd y Swyddog Hawliau Tramwy Cyhoeddus (neu unrhyw gynrychiolydd enwebedig) yn cyflwyno'r adroddiad ac yn mynd i'r afael ag unrhyw Faterion sy'n Codi neu sylwadau ysgrifenedig.
- Gofynnir i'r rheini sy'n gwrthwynebu'r cais cynllunio gyflwyno'u sylwadau. Ni chaniateir i'r rheini sy'n siarad ofyn unrhyw gwestiynau i Swyddogion nac i'r Is-bwyllgor. Gall Aelodau'r Is-bwyllgor sydd eisiau gofyn am eglurhad ar unrhyw bwynt wneud hynny ar ddiwedd y cyfnod siarad a ganiateir, ond ni ddylent dorri ar draws na chwestiynu'r siaradwr/siaradwyr fel arall mewn unrhyw fodd.
- Yna bydd gan unrhyw Gynghorwyr Cyngor Bro Morgannwg nad ydynt yn aelod o'r Is-bwyllgor Hawliau Tramwy Cyhoeddus hawl i annerch yr Is-bwyllgor, yn amodol ar gyfyngiad amser o **5 munud** fesul Cynghorydd. Gall Aelodau'r Is-bwyllgor sydd eisiau gofyn am eglurhad ar unrhyw bwynt wneud hynny ar ddiwedd y cyfnod siarad a ganiateir, ond ni ddylent dorri ar draws na chwestiynu'r siaradwr/siaradwyr fel arall mewn unrhyw fodd.

- Yna bydd gan unrhyw Gynrychiolwyr Cyngor Tref a Chymuned hawl i annerch yr Is-bwyllgor, yn amodol ar gyfyngiad amser o 3 munud fesul Cynghorydd. Gall Aelodau'r Is-bwyllgor sydd eisiau gofyn am eglurhad ar unrhyw bwynt wneud hynny ar ddiwedd y cyfnod siarad a ganiateir, ond ni ddylent dorri ar draws na chwestiynu'r siaradwr/siaradwyr fel arall mewn unrhyw fodd.
- Yna gofynnir i'r rheini sy'n cefnogi'r cais gyflwyno eu sylwadau. Ni chaniateir i'r rheini sy'n siarad ofyn unrhyw gwestiynau i Swyddogion nac i'r Is-bwyllgor. Gall Aelodau'r Is-bwyllgor sydd eisiau gofyn am eglurhad ar unrhyw bwynt wneud hynny ar ddiwedd y cyfnod siarad a ganiateir, ond ni ddylent dorri ar draws na chwestiynu'r siaradwr/siaradwyr fel arall mewn unrhyw fodd.
- Yna gall Swyddogion y Cyngor neu gynrychiolwyr enwebedig wneud sylwadau ar y sylwadau a gafwyd a theilyngdod y cais.

(D.S. Nid oes angen i Aelodau Cyngor Bro Morgannwg gofrestru i siarad.)

Ymuno o Bell

Bydd cyfarfodydd yn cael eu cynnal o bell drwy system gyfarfod Hybrid/O bell y Cyngor.

Bydd siaradwyr cofrestredig yn gallu ymuno â'r ystafell gyfarfod o bell trwy glicio ar y ddolen ymuno URL a anfonwyd atynt ymlaen llaw gan y Swyddog Gwasanaethau Democrataidd a Chraffu. Byddant yn cael eu rhoi'n awtomatig mewn ystafell aros rithwir i westeion nes bod y Swyddog Gwasanaethau Democrataidd a Chraffu yn eu derbyn i'r ystafell gyfarfod o bell.

Ceisiadau Gohiriedig

Os caiff cais ei ohirio mewn cyfarfod yr Is-bwyllgor ar y sail bod angen rhagor o wybodaeth a/neu ddadansoddi, bydd yr un weithdrefn ar gyfer siarad cyhoeddus yn berthnasol pan ystyrir y cais mewn cyfarfod/ydd dilynol yr Is-bwyllgor. **Felly, bydd angen i unigolion a oedd wedi'u cofrestru i siarad ar gais, sydd wedi'i ohirio gan yr Is-bwyllgor, ail-gofrestru cyn y cyfarfod nesaf pan gaiff y cais ei ail-ystyried.**

Gwybodaeth arall

Os bydd aelod o'r cyhoedd yn torri ar draws y trafodion, bydd y Cadeirydd yn rhybuddio'r person dan sylw (Adran 4.28 Cyfansoddiad y Cyngor). Os bydd yn parhau i darfu ar y cyfarfod, bydd y Cadeirydd yn gorchymyn iddo gael ei symud o'r cyfarfod.

Sylwch hefyd nad yw'r weithdrefn hon yn berthnasol i ymweliadau safle'r Is-bwyllgor Hawliau Tramwy Cyhoeddus, lle na chaniateir siarad cyhoeddus.

Hysbysiad Preifatrwydd ar gyfer Gwasanaethau Democrataidd a Chraffu

(Mae'r Hysbysiad Preifatrwydd hwn yn atodol i Hysbysiad Preifatrwydd Corfforaethol y Cyngor sydd wedi'i gysylltu isod)

https://www.valeofglamorgan.gov.uk/cy/our_council/Website-privacy-notice.aspx

Mae'r hysbysiad preifatrwydd hwn yn benodol ar gyfer Gwasanaethau Democrataidd a Chraffu.

Mae Gwasanaethau Democrataidd a Chraffu yn darparu cymorth a gweinyddiaeth ar gyfer system Bwyllgorau'r Cyngor er mwyn iddo weithredu'n effeithiol.

Yn benodol maent yn gwneud y canlynol:

- Trefnu ac amserlennu cyfarfodydd,
- Penderfynu a fydd y cyfarfod yn un cyhoeddus,
- Cyhoeddi hysbysiadau cyhoeddus yn ymwneud â'r cyfarfod,
- Gwahodd unigolion i fynychu,
- Ymdrin â gohebiaeth a dderbyniwyd yn ymwneud â busnes y cyfarfod,
- Ymdrin ag ymholiadau yn ymwneud â busnes y cyfarfod,
- Cymryd cofnodion y cyfarfod perthnasol,
- Cyhoeddi papurau agenda a chofnodion,
- Ymdrin ag unrhyw fater arall sy'n berthnasol i fusnes y cyfarfod,
- Trefnu i gadw dogfennau ac adroddiadau sy'n ymwneud â'r Pwyllgor.

Yng nghyd-destun yr hysbysiad hwn mae'r gair cyfarfod yn cynnwys:

- Cyfarfodydd y Cyngor
- Y Pwyllgor Cynllunio
- Is-bwyllgor Hawliau Tramwy Cyhoeddus (o'r Pwyllgor Cynllunio)
- Cyfarfodydd Is-bwyllgorau'r Cyngor
- Y Pwyllgor Craffu
- Cyfarfodydd Is-bwyllgor Craffu'r Cyngor
- Pwyllgor Apeliadau Addysg

- Pwyllgor Llywodraethu ac Archwilio
- Unrhyw gyfarfod arall sy'n cael ei gynorthwyo gan y Gwasanaethau Democratiaidd a Chraffu

Er mwyn hyrwyddo Llywodraeth a Democratiaeth agored cynhelir y rhan fwyaf o gyfarfodydd y Cyngor yn gyhoeddus ac yn unol â hynny bydd unrhyw beth a drafodir yn y cyfarfodydd hynny yn gyhoeddus a bydd unrhyw gofnodion, recordiadau neu ffrydiau byw hefyd yn gyhoeddus. Fodd bynnag, mae rhai amgylchiadau lle nad yw'n briodol i faterion gael eu trafod yn gyhoeddus, er enghraifft busnes personol unigolion neu wybodaeth sy'n sensitif yn ariannol/fasnachol. Bydd agenda'r cyfarfod yn egluro sut y bydd gwybodaeth yn cael ei thrin.

Yn unol â hynny, os ydych:

- yn cyflwyno gwybodaeth i'w thrafod mewn cyfarfod Pwyllgor, neu
- yn mynd i gyfarfod Pwyllgor er mwyn siarad, neu
- yn cyflwyno dogfennau i Bwyllgor, neu
- yn cyflwyno deisebau i Bwyllgor, neu
- yn cyflwyno sylwadau i Bwyllgor, neu
- yn cyflwyno neu'n darparu dogfennau / deisebau ar ran eraill.

Ymdrinnir â'r wybodaeth hon yn agored ac yn gyhoeddus oni bai nad yw'r cyfarfod, neu ran o'r cyfarfod, sy'n ei drafod yn gyfarfod cyhoeddus yn unol â'r darpariaethau eithrio gwybodaeth yng Nghyfansoddiad y Cyngor.

Os ydych yn cael gwybodaeth oddi wrth drydydd parti mae angen i chi sicrhau eu bod yn deall yr uchod a **chydsynio** i'w gwybodaeth gael ei rhoi yn y parth cyhoeddus. Gall y Cyngor ofyn i chi gadarnhau hyn ac efallai na chaiff gwybodaeth ei chyhoeddi ymhellach oni bai ein bod yn fodlon bod trydydd partion wedi cael gwybod am hyn.

Sut rydym yn casglu gwybodaeth gennych?

Rydym yn casglu gwybodaeth gennych pan fyddwch yn ymweld â <https://www.valeofglamorgan.gov.uk/cy/Index.aspx>. Hefyd, pan fyddwch yn cysylltu â ni yn ysgrifenedig, yn siarad â ni ar y ffôn, yn anfon e-bost atom neu'n siarad â ni wyneb yn wyneb.

Pa fathau o wybodaeth rydym yn eu casglu gennych?

Er mwyn darparu'r gwasanaeth, efallai y bydd angen i'r Cyngor brosesu rhan neu bob un o'r categorïau gwybodaeth bersonol a ganlyn ynghylch aelodau'r cyhoedd neu aelodau etholedig:

- Enw a theitl
- Cyfeiriad
- Rhif Cyswllt
- Cyfeiriad e-bost

- Sylwadau sy'n ymwneud â busnes y Cyngor
- Gofynion arbennig er mwyn mynychu cyfarfodydd, gan gynnwys siarad yn Gymraeg

Sut mae eich gwybodaeth yn cael ei defnyddio?

Yn unol â'n tasgau cyhoeddus mae'r canlynol yn berthnasol:

- I'w defnyddio yn y cyfarfod fel y nodir uchod,
- Wrth gofrestru i siarad mewn cyfarfodydd pwyllgorau, bydd manylion aelodau o'r cyhoedd yn cael eu cynnwys yng nghronfa ddata gyfrifiadurol y Cyngor.
- Gellir rhannu unrhyw gofrestrïadau i siarad mewn cyfarfodydd Pwyllgorau ac unrhyw wybodaeth a gyflwynir i Gynghorwyr a'r Gwasanaethau Democrataidd a Chraffu gyda swyddogion y Cyngor a phartneriaid cysylltiedig (e.e. sefydliadau y mae'r Cyngor yn cydweithio â hwy i ddarparu gwasanaethau) i dderbyn eu sylwadau a'u hystyriaeth broffesiynol.
- Gellir cadw unrhyw ohebiaeth ysgrifenedig a ddaw i law ar ffeil er mwyn i'r Cyngor gyfeirio ati yn y dyfodol.
- Galluogi Aelodau neu swyddogion y Cyngor i ymchwilio i neu gynorthwyo gydag unrhyw faterion y gallech fod wedi'u codi. Hefyd, fel y gallwn roi gwybod i chi am unrhyw ddiweddariadau.
- Atgyfeirio eich sylwadau cyhoeddus i Bwyllgorau er mwyn llywio'r broses o wneud penderfyniadau.
- Os rhoddir eich caniatâd datganedig, rhannu gydag aelodau eraill o'r cyhoedd sydd wedi cofrestru i siarad er mwyn enwebu siaradwr.

Pwy all weld eich gwybodaeth?

Fel arfer byddwn ond yn rhannu data personol gyda staff Cyngor Bro Morgannwg neu Aelodau Etholedig sydd ei angen i gyflawni eu swyddogaethau. Fodd bynnag, fel yr amlinellir uchod, os caiff ei drafod mewn cyfarfod cyhoeddus, bydd y wybodaeth ar gael i'r cyhoedd.

Yn ogystal, mae'n bosibl y byddwn yn dibynnu ar nifer o eithriadau, sy'n ein caniatáu i rannu gwybodaeth heb fod angen nodi sail gyfreithlon ar gyfer y rhannu a heb fod angen rhoi gwybodaeth i chi am y rhannu.

Seiliau cyfreithiol

Dyma ein **seiliau cyfreithiol** ar gyfer prosesu eich gwybodaeth bersonol:

- Caniatâd.
- Os yw'r prosesu'n angenrheidiol er mwyn cyflawni tasg a gyflawnir gennym er budd y cyhoedd neu wrth arfer yr awdurdod a freiniwyd ynom.
- Mae'r prosesu'n angenrheidiol er mwyn diogelu eich buddiannau hanfodol chi neu fuddiannau unigolyn arall.
- Mae'r prosesu'n angenrheidiol er mwyn cydymffurfio â rhwymedigaeth gyfreithiol yr ydym yn ddarostyngedig iddi.

Beth yw'ch hawliau o ran y data personol rydym yn ei brosesu?

- **Mynediad** – gallwch ofyn am gopiâu o unrhyw wybodaeth personol amdanoch a gedwir gan y Cyngor.
- **Cywiro** - gallwch ofyn i ni gywiro unrhyw wybodaeth anghywir.
- **Dileu** – gallwch ofyn i ni ddileu eich gwybodaeth personol. Gall y Cyngor wrthod dileu gwybodaeth os oes gennym reswm cyfreithiol dros ei chadw.
- **Hygludedd** – gallwch ofyn i ni drosglwyddo eich data personol i wahanol wasanaethau neu atoch chi.
- **Hawl i wrthwynebu prosesu data neu gyfyngu arno** – mae gennych yr hawl i wrthwynebu sut mae eich data'n cael ei ddefnyddio a sut bydd yn cael ei ddefnyddio yn y dyfodol.
- **Hawl i atal penderfyniadau awtomatig** – mae gennych yr hawl i herio penderfyniad sy'n effeithio arnoch sydd wedi'i wneud yn awtomatig heb ymyrraeth gan fod dynol.

Am faint y byddwn yn cadw eich gwybodaeth?

Byddwn yn cadw a dileu'r holl gofnodion yn unol â'n hamserlen cadw cofnodion. Cysylltwch â'r Adran Gwasanaethau Democrataidd a Chraffu ar 01446 709 855 neu Democratic@valeofglamorgan.gov.uk i gael mwy o wybodaeth.

Pa fesurau diogelwch sydd ar waith i amddiffyn eich gwybodaeth rhag cael ei cholli, ei newid neu ei chamddefnyddio?

Rydym wedi ymrwmo'n gryf i ddiogelu data a byddwn yn cymryd yr holl gamau rhesymol a phriodol i ddiogelu eich gwybodaeth personol rhag cael ei cholli, ei chamddefnyddio, ei newid neu ei llygru, a rhag mynediad heb ei awdurdodi. Rydym wedi rhoi gweithdrefnau ffisegol, electronig a rheoliadol ar waith i ddiogelu'r wybodaeth rydych yn ei rhoi i ni. Fodd bynnag, ni allwn warantu diogelwch unrhyw wybodaeth rydych yn ei hanfon atom. Rydym yn argymhell eich bod yn cymryd pob cam posib i warchod eich gwybodaeth personol.

Ffrydio byw

Bydd rhai cyfarfodydd Cyngor Bro Morgannwg yn cael eu ffrydio'n fyw. Byddwch yn cael gwybod ar lafar os bydd y cyfarfod rydych yn ei fynychu yn cael ei ffrydio'n fyw. Os felly, mae hyn yn golygu eich bod yn cael eich recordio'n weledol ac mewn sain a bod hyn ar gael ar y rhyngwyd. Gwneir hyn at ddibenion cefnogi a hyrwyddo ymgysylltu democrataidd a budd y cyhoedd. Byddwn yn cadw'r data am 6 blynedd ac yna'n ei gynnig i'r Archifydd yn Archifdy Morgannwg ar gyfer cadw'n barhaol. Mae gennych hawl i wneud cais i gael gweld, cywiro, cyfyngu ar, gwrthwynebu neu ddileu'r data hwn.

Cwynion

Os hoffech wneud cwyn am y defnydd o'ch data personol gallwch gysylltu â'n Swyddog Diogelu Data:

Drwy'r post:Uned Rhyddid Gwybodaeth
Swyddfeydd Dinesig, Heol Holltwn, y Barri, CF63 4RU.

Dros y ffôn: 01446 700111.

E-bost: DPO@valeofglamorgan.gov.uk

I gael cyngor annibynnol ar faterion rhannu data, preifatrwydd a diogelu data, gallwch gysylltu â'r Comisiynydd Gwybodaeth (CG) yn www.ico.org.uk